

Hubungan KL-Beijing capai tahap baru

BH 31 MAY 1994

KUALA LUMPUR, Isnin — Hubungan Malaysia dan China kini mencapai satu tahap baru persefahaman dan kerjasama, dan kedua-dua negara harus bangga dengan perkembangan itu, kata Datuk Seri Dr Mahathir Mohamad.

Perdana Menteri berkata, dalam masa lima tahun kebelakangan ini, hubungan dua hala antara kedua-dua negara meningkat dengan begitu pesat dalam banyak bidang kerjasama.

"Saya percaya keadaan ini dapat diperkukuhkan lagi pada tahun-tahun akan datang," katanya dalam perutusan kepada Perdana Menteri China, Li Peng, sempena ulang tahun ke-20 pembentukan hubungan diplomatik di antara China dan Malaysia, hari ini. Kandungan perutusan itu dikeluarkan oleh Wisma Putra.

Hubungan rasmi antara kedua-dua negara dimeterai di Beijing pada 31 Mei 1974, di antara Allahyarham Tun Abdul Razak, Perdana Menteri ketika itu dan mendiang Chou En-Lai, Perdana Menteri China pada masa itu.

Dr Mahathir merakamkan sanjungan tinggi terhadap wawasan dan keberanian Tun Razak kerana Malaysia adalah negara Asean pertama mengadakan hubungan itu.

"Saya rasa pujian bagi kewujudan hubungan erat di antara Malaysia dan China ini patut diberi kepada kepemimpinan China yang pragmatik dan berpandangan jauh," kata Dr Mahathir.

Beliau berkata, dasar hubungan berbaik-baik dengan negara jiran membawa perkembangan positif dalam hubungan dua hala.

Dr Mahathir berkata, Malaysia dan China boleh berbangga dengan perkembangan yang memuassakan ini sejak dua dekad lalu.

Selain peningkatan pesat kerjasama di bidang ekonomi, perdagangan dan pelaburan, Dr Mahathir berkata kerjasama di bidang lain seperti pelancongan dan hubungan di antara rakyat dan rakyat akan meningkatkan persefahaman dan persahabatan.

Menteri Luar, Datuk Abdullah Ahmad Bada-

LIHAT MUKA 2

Hubungan KL-Beijing capai tahap baru

BH 31 MAY 1994

DARI MUKA 1

wi, juga menghantar perutusan yang serupa kepada rakan sejawatannya, Qian Qichen.

Sementara itu, Li Peng dalam perutusan ucapan tahniahnya kepada Dr Mahathir berkata, China dan Malaysia adalah dua negara membangun yang memiliki pengalaman sejarah serupa dan sedang melaksanakan tugas berat untuk memajukan ekonomi masing-masing.

"Benih persahabatan China-Malaysia yang disemai 20 tahun lalu kini membuahkan hasil. Saya yakin persahabatan yang sedang dibajai itu akan menjadi lebih subur pada tahun-tahun akan datang," Li Peng dipetik oleh kenyataan Kudu-taan China, di sini, hari ini.

Mengimbas kembali tiga lawatan Dr Mahathir ke China beberapa tahun lalu, Perdana Menteri China itu berkata lawatan itu saling memupuk persefahaman dan kepercayaan serta membawa hubungan China-Malaysia ke satu era pembangunan.